



**Sapigalinnut ulluinnarni nerisassat nioqqutissat nunatsinnut ajornannginnerusumik eqquossinnaalernissaannut Naalakkersuisut nalunaarusioqqullugit peqquneqarnissaat pillugu Inatsisartut aalajangiiffigisassaattut siunnersuut. Nunaniit allaniit nioqqutissat taakku eqquossinnaalernissaannut inatsisitigut qanoq allannguinnissaq pisariaqarnersoq, qanorlu akimikkut Danmarkimiit nioqqutissanut unammillernerusinnaalersinnaaneri nalunaarusiamut ilanngunneqassapput. Nalunaarusiaq kingusinnerpaamik UKA2023-mi Inatsisartunut agguanneqassaaq. (Inatsisartunut ilaasortaq Aqqalu C. Jerimiassen, Atassut)
(Siullermeerneqarnera)**

Qujanaq Inatsisartunut ilaasortamut Aqqalu C. Jerimiassen-imut uuminnga siunnersuuteqarneranut.

Demokraatit siunnersuuteqartoq isumaqatigaat, pitsaassagaluartoq, inuussutissat maani nunatsinni akikinnerulerualarpata. Siunnersuuteqartoq assigalugu aamma uagut maluginiarsimavarput, inuussutissat sapigaqartunut tunngatinneqartut sapigaqanngitsunut assersuukkaanni akisunerusartut. Soorunalumi apeqqutaalerpoq, qanoq iliorsinnaanersugut, nunatta kasia inuussutissanut aalajangersimasunut toqqaannartumik tapiissuteqartinngikkaluarlugu.

Tassunga assersuutissatsialak taakkunungarluinnaq tunngassuteqarpoq. Demokraatit inatsisartunut ilaasortaata februar 2022 apeqquteqarpoq ulluinnarni atortussat akissa misissorneqarnerat sumut killinnersoq. Qaammatit quligiluat qaangiutilerpoq, Naalakkersuisorlu sulii akissuteqanngilaq. Tamanna ajorluinnarpoq. Manna iluatsillugu Naalakkersuisut ilungersorneruleqqullugu piumaffigissavara. Inatsisartunut ataqqinninneq uteqqittariaqarpoq.

Inatsisartunut ilaasortamut Aqqalu C. Jerimiassenimit siunnersuut una ulluinnarni atortusat akiinik misissuinissamut eqqaanartorujussuuvoq, Naalakkersuisunit isiginngitsuusaarniarlugu toqqarneqarsimasumit akerusunneqanngitsumullu. Demokraatit tungaanniit nalunaarutigissavara, isumaqaratta, isummassarsiatsialaasoq, misissuinissaq, arlaatigut allannguinnissamut periarfissaqarnersoq, taamaasilluni sapigalinnut ulluinnarni pisiassat pisiniarfinni akikinneruerniassammata.

Taamatut oqaaseqarluta siunnersuutip ataatsimiititaliamut susassaqtumut suliareqqitassanngorlugu ingerlateqqinneqarnissaanik innersuussuteqarpugut.